



Broj:181-2/I-25

Sarajevo, 15. april 2025. godine

Na osnovu člana 113. Statuta Univerziteta u Sarajevu, Vijeće Instituta na 5. elektronskoj sjednici, održanoj 15. aprila 2025. godine, donijelo je

ODLUKU

o donošenju Pravilnika o radu naučnoistraživačkog osoblja Univerziteta u Sarajevu - Instituta za istraživanje zločina protiv čovječnosti i međunarodnog prava na naučnoistraživačkim projektima

I

Vijeće Univerziteta u Sarajevu – Instituta za istraživanje zločina protiv čovječnosti i međunarodnog prava donosi Pravilnik o radu naučnoistraživačkog osoblja Univerziteta u Sarajevu - Instituta za istraživanje zločina protiv čovječnosti i međunarodnog prava na naučnoistraživačkim projektima.

II

Pravilnik iz tačke 1. čini sastavni dio ove odluke.

III

Ova odluka stupa na snagu danom donošenja.

PREDSJEDAVAJUĆI VIJEĆA

Dr. sc. Muamer Džananović, viši naučni saradnik

Na osnovu Zakona o radu Federacije Bosne i Hercegovine, Zakona o naučnoistraživačkoj djelatnosti Kantona Sarajevo, člana 113, stav (d) Statuta Univerziteta u Sarajevu, Vijeće Univerziteta u Sarajevu – Instituta za istraživanje zločina protiv čovječnosti i međunarodnog prava, na 5. elektronskoj sjednici održanoj 15. aprila 2025. godine donosi

PRAVILNIK

o radu naučnoistraživačkog osoblja Univerziteta u Sarajevu – Instituta za istraživanje zločina protiv čovječnosti i međunarodnog prava na naučnoistraživačkim projektima

Član 1.

(1) Ovim pravilnikom utvrđuju se procedure i rad naučnoistraživačkog osoblja Univerziteta u Sarajevu – Instituta za istraživanje zločina protiv čovječnosti i međunarodnog prava (u daljem tekstu: Institut) na naučnoistraživačkim projektima.

(2) Pravilnik precizira način predlaganja, prijave, ocjene, usvajanja i druga pitanja vezana za projekte koji se realizuju u Institutu, kao i izvan njega, u cilju produktivnijeg i zakonitog rada naučnoistraživačkog osoblja Instituta.

(3) Odredbe ovog pravilnika odnose se na naučnoistraživačko osoblje Instituta.

Član 2.

(1) Vijeće Instituta, u skladu sa članom 113. stav (d) Statuta Univerziteta u Sarajevu, utvrđuje naučnoistraživačke projekte, kao i strateške projekte za razvoj Instituta, prati njihovu realizaciju, daje odgovarajuće smjernice, određuje voditelje projekata i ocjenjuje kvalitetu ostvarenih projekata.

Član 3.

(1) U skladu s obavezom da učestvuje u realizaciji naučnoistraživačkog i istraživačkorazvojnog rada u Institutu, naučnoistraživačko osoblje radi na projektima i to u okviru izbornih perioda propisanih odredbama članova Zakona o naučnoistraživačkoj djelatnosti Kantona Sarajevo, a u vezi s odredbama ugovora o radu.

(2) Uposlenici Instituta izabrani u naučna zvanja moraju imati prijavljen najmanje jedan naučni projekat na kojem su rukovodioci.

(3) Uposlenici Instituta izabrani u istraživačka zvanja moraju učestvovati kao članovi tima na najmanje jednom projektu, a mogu obavljati i funkciju rukovodioca naučnog projekta.

Član 4.

(1) Vijeće Instituta odlučuje o početku rada na projektu kroz donošenje posebne odluke o prihvatanju projekta, osim u posebnim okolnostima, kada odluku može donijeti i direktor Instituta.

(2) U slučaju da odluku donosi direktor Instituta, o tome treba upoznati Vijeće, uz navođenje razloga.

Član 5.

(1) Rukovodilac projekta dužan je u roku od mjesec dana nakon završetka istraživanja na projektu podnijeti izvještaj o rezultatima istraživanja.

(2) Vijeće Instituta, na osnovu podnesenog izvještaja razmatra isti, te donosi konačnu odluku o završetku projekta.

(3) Na osnovu navedene odluke, naučnoistraživačko osoblje podnosi prijedlog novog projekta Vijeću Instituta u roku od 3 (tri) mjeseca.

Član 6.

(1) Prilikom izbora tema projekata, vodit će se računa o tome da to budu teme iz nedovoljno obrađenih ili istraženih područja iz djelatnosti Instituta ili eventualno područja za koja je potrebno izvršiti ponovno sagledavanje postojećih naučnih rezultata. Tema projekta definiše se u dogovoru s direktorom Instituta.

Član 7.

(1) Prijedlog projekta podnosi naučnoistraživačko osoblje, pismenim putem na propisanom Obrascu prijave naučnoistraživačkog projekta.

(2) Sjednici Vijeća na kojoj se raspravlja o prijedlogu projekta ili donošenju odluke o završetku projekta obavezno prisustvuje podnosilac projekta, a radi eventualnih dodatnih pojašnjenja i dopuna.

(3) Prilikom prihvatanja projekta u obzir se uzimaju sve objektivne okolnosti (moguća finansijska podrška, potrebe za istraživanjima u inostranstvu, ograničavajuće okolnosti i slično).

Član 8.

(1) Članovi Vijeća imaju pravo da, na sjednici na kojoj se odlučuje o prihvatanju projekta, zahtijevaju od podnosioca prijave dodatne izmjene, korekcije ili dopune prijedloga projekta o kome se raspravljalo, a sve u cilju bolje naučne utemeljenosti i jasnijeg definisanja etapa i faza procesa naučnog istraživanja.

Član 9.

(1) Naučnoistraživačko osoblje ima mogućnost apliciranja s naučnim projektima posredstvom Instituta na javne pozive i konkurse.

Član 10.

(1) Na naučnim projektima Instituta rukovodilac može predložiti angažovanje spoljnih saradnika i konsultanata na projektu. Troškovi za rad spoljnih saradnika i konsultanata osiguravaju se iz sredstava projekta.

(2) U toku rada na projektu na prijedlog rukovodioca izmjene ili dopune sastava članova tima može odobriti direktor.

Član 11.

(1) Projekti Instituta koji su prošli trenutno važeću proceduru prihvatanja smatraju se aktuelnim. Završetak rada na tim projektima izvršit će se u skladu s ovim pravilnikom.

Član 12.

(1) Projekti naučnoistraživačkog osoblja Instituta završeni 2024. ili ranijih godina, koji bi u budućnosti mogli biti publikovani u formi knjiga ili monografija, preporučuje se da budu objavljeni u okviru izdavačke djelatnosti Instituta, u skladu s Pravilnikom o izdavačkoj djelatnosti Instituta.

Član 13.

(1) Pri učešću u realizaciji naučnoistraživačkih projekata za druge ustanove, organizacije ili udruženja, koji su iz oblasti djelatnosti Instituta i rezultiraju objavljivanjem (ko)autorskih knjiga ili monografija, neophodno je da te institucije upute pisani zahtjev s obrazloženjem za angažman naučnoistraživačkog osoblja Instituta.

(2) Na temelju zahtjeva iz prethodnog stava, direktor Instituta donosi odluku o angažmanu zaposlenika Instituta na takvim projektima. Ako smatra neophodnim, direktor može zahtjev proslijediti i Vijeću radi donošenja odluke.

(3) Učešće u realizaciji projekata iz prvog stava ne smije ugrožavati redovan rad Instituta.

Član 14.

(1) Projekti Instituta koji rezultiraju objavom naučne publikacije, a nakon provedene procedure u skladu s Pravilnikom o izdavačkoj djelatnosti Instituta, Institut je obavezan vlastitim sredstvima štampati u tiražu od minimalno 100 primjeraka.

(2) Ako Institut nije u mogućnosti finansirati štampanje naučne publikacije ili ako Izdavački savjet i/ili Vijeće odbiju objavljivanje rukopisa, autor(i) se mogu obratiti drugom izdavaču.

Član 15.

(1) Ovaj pravilnik stupa na snagu danom donošenja i bit će objavljen na oglasnoj ploči i zvaničnoj web-stranici Instituta.

Član 16.

(1) Stupanjem na snagu ovog pravilnika, stavljaju se van snage Zaključci koje je Vijeće Instituta usvojilo na drugoj redovnoj sjednici, od 23. januara 2025. godine.

Broj: 181-2-1/25

Sarajevo, 15. april 2025. godine

PREDSJEDAVAJUĆI VIJEĆA

[Redacted signature]

Dr. sc. Muamer Džananović, viši naučni saradnik

